

Na osnovu člana 11. Zakona o finansijskom upravljanju i kontroli u javnom sektoru u Federaciji Bosne i Hercegovine („Službene novine Federacije Bosne i Hercegovine“, broj 38/16), a u vezi sa članom 4. Zakona o izvršavanju Budžeta Kantona Sarajevo za 2024. godinu („Službene novine Kantona Sarajevo“, broj 55/23) i Budžeta Kantona Sarajevo za 2024 godinu („Službene novine Kantona Sarajevo“, broj 55/23), te u vezi sa članom 5. stav (2) Zakona o privremenom preuzimanju sufinansiranja institucija kulture i obrazovanja čiji je osnivač Bosna i Hercegovina („Službene novine Kantona Sarajevo“, broj 17/24), ministar kulture i sporta Kantona Sarajevo, d o n o s i

PRAVILNIK
o internim procedurama sufinansiranja institucija iz oblasti kulture čiji je osnivač Bosna i Hercegovina

Član 1.
(Predmet)

Ovim pravilnikom se utvrđuju interne procedure dodjele sredstava ustanovama iz oblasti kulture čiji je osnivač Bosna i Hercegovina, kriteriji za sufinansiranje, kao i procedura izvještavanja o radu, poslovanju i utrošku dodjeljenih finansijskih sredstava.

Član 2.
(Svrha Pravilnika)

Svrha ovog pravilnika je da se i putem internih procedura u Ministarstvu kulture i sporta Kantona Sarajevo (u daljem tekstu: Ministarstvo) osigura zakonito, transparentno i ekonomično korištenje javnih sredstava.

Član 3.
(Upotreba rodno osjetljivog jezika)

Riječi muškog ili ženskog roda upotrijebljene u ovom pravilniku koriste se neutralno i odnose jednako na muški i ženski rod.

Član 4.
(Korisnici sredstava Ministarstva)

Korisnici sredstava Ministarstva, u skladu sa članom 2. stav (1) tač. c) do g) Zakona o privremenom preuzimanju sufinansiranja institucija kulture i obrazovanja čiji je osnivač Bosna i Hercegovina („Službene novine Kantona Sarajevo“, broj 17/24) (u daljem tekstu: Zakon) su:

- a) Historijski muzej Bosne i Hercegovine,
- b) Muzej književnosti i pozorišne umjetnosti Bosne i Hercegovine,
- c) Kinoteka Bosne i Hercegovine,
- d) Umjetnička galerija Bosne i Hercegovine,
- e) Biblioteka za slijepa i slabovidna lica u Bosni i Hercegovini.

Član 5.
(Zahtjev za dodjelu sredstava)

U svrhu dodjele sredstava, institucije iz člana 4. ovog pravilnika su dužne najkasnije do 31. januara tekuće godine dostaviti Ministarstvu zahtjev za dodjelu sredstava sa podacima o broju zaposlenih i iznosu sredstava neophodnih za isplatu naknada i troškova iz člana 5. stav (3) Zakona.

Član 6.

(Sredstva za sufinansiranje)

Sufinansiranje institucija iz člana 4. ovog pravilnika vršit će se prema odobrenim i raspoloživim sredstvima u Budžetu Kantona Sarajevo sa pozicije Ministarstva.

Član 7.

(Sufinansiranje plata, naknada i troškova)

- (1) Ministarstvo će, u skladu sa raspoloživim sredstvima u Budžetu sufinansirati plate sa pripadajućim doprinosima zaposlenih radnika u institucijama iz člana 4. ovog pravilnika u iznosu najniže plate utvrđene važećim Kolektivnim ugovorom za djelatnost kulture u Kantonu Sarajevo.
- (2) Sufinansiranje ostalih naknada i troškova iz člana 5. stav (3) Zakona Ministarstvo će izvršiti iz raspoloživih sredstava iz Budžeta za tekuću godinu što će se preciznije definisati posebnim ugovorom iz člana 6. stav (3) Zakona.

Član 8.

(Korištenja sredstava Ministarstva)

- (1) Institucije iz člana 3. ovog pravilnika su dužne dodijeljena finansijska sredstva utrošiti za namjene utvrđene članom 5. stav (3) Zakona, a u skladu sa članom 7. ovog pravilnika i ugovorom.
- (2) Nakon izvršene isplate plate radnicima, institucije iz člana 4. ovog pravilnika su dužne Ministarstvu dostaviti informaciju o isplati sa relevantnom dokumentacijom i to u roku od 7 dana od dana izvršene isplate.

Član 9.

(Ugovor)

Ministar kulture i sporta Kantona Sarajevo će, u skladu sa članom 6. stav (3) Zakona, sa svakom institucijom iz člana 3. ovog pravilnika potpisati ugovor kojim će se definisati međusobna prava i obaveze ugovornih strana te precizirati izvještavanje ministarstva o namjenskom utrošku dodjeljenih finansijskih sredstava.

Član 10.

(Stupanje na snagu)

Ovaj Pravilnik stupa na snagu narednog dana od dana objavljivanja na web stranici Ministarstva.

Broj: 12-01/02-02-29506/24

Datum: 22.5.2024. godine

MINISTAR

Kenan Magoda, s.r.